



**Paasissutissanik qarasaasiatigut suliarinnittarfinnik angisuunik Kalaallit Nunaannut inissinissaq nunani tamalaani ingerlatseqatigiiffinnut pilerinartunngortinniarlugu naalakkersuinikkut suliniutinik sunik aallartitsisoqarsinnaanera pillugu nassuiaasioqqullugit Naalakkersuisut peqqunneqarnissaannik Inatsisartut aalajangiiffigisassaattut siunnersuut. Nassuiaat 1. januar 2027-utinnagu Inatsisartunut agguaanneqassaaq.**

(Inatsisartunut ilaasortaq Jørgen Rosbach, Demokraatit)

(Siullermeerneqarnera)

Qujanaq Demokraatit Inatsisartunut ilaasortaatitaanut Jørgen Rosbach-imut siunnersuummut siumut isigisumut siammasissumillu siunnersuuteqarneranut.

Digitalinngorsaaneq nunarsuarmi aningaasaqarnermut annerpaamik nukittorsaataavoq, aammalu pisariaqartitsinermit qulakkeerinninnissamut, paasissutissanik qarasaasiatigut suliarinnittarfiit aalaakkaasut imminullu akilersinnaasut ukiumit ukiumut alliartornissaannut. Maani nunatsinni pinngortitap tunniusnaanik immikkuullarissumik periarfissaqarpugut ineriartornermut tassunga peqataanissatsinnut.

Silaannatta nillertup, pissutsit aalaakkaasut aammalu mingutsitsinngitsumik nukissiuuteqarsinnaanitta suliffeqarfinnut nukissiuutinik pisariaqartitsisunik paasissutissanik katersivinnik mingutsitsinngittunik ingerlatserusuttunut, immikkut pilerinartunngortippaatigut. Pingaartumik erngup nukinga unammillerutigineqarsinnaavoq, Kalaallit Nunaannik soqutiginartunngortitsisinnaasoq nunanit tamaaanik aningaasaleerusuttunut. Nukissiuutit attanneqarsinnaasut aammalu nillissutsip ataqatigiissinneqarnerata kingunerissavaa ingerlatsinermit aningaasartuutit annikinneruneri aammalu CO2-mik aniatitsinerup annertuumik annikillineqarnera.

Maani nunatsinni paasissutissanik qarasaasiatigut suliarinnittarfiup pilersinneri inuussutissarsiutigineqaleriaannaavoq nutaaq pingaarutilillu, suliffinnik pilersitsisoq, piginnaasanik ineriartortitsinermit qaffassaataasoq aammalu nunanit allanit aningaasaleerusussuseqalernermik. Misilittakkat nunanit allanit soorlu Island aamma Sverige takutippaat, toraagalimmik politikkikkut suliniutit aammalu sinaakkutit pitsaasut allannguisinnaalluurtut. Taamaattumik silatusaarneruvoq misissussallugu, qanoq pitsaanerpaamik pilerinartutut unammillersinnaasutullu inississinnaanersugut.

Taamatuttaarlu ilalernartipparput, Naalakkersuisut periarfissatut unamminartutullu tikkuareersimasai Tasersiami aamma Tarsartuup Tasersuani imermik nukissiuuteqarnissamut periarfissaalluurtut. Tassani paasissutissanik qarasaasiakkut toqqorteriviit nukimmik mingutsitsinngitsumik atuisinnaasussatut periarfissaareerput. Aamma Nuummi Utoqqarmiut Kangerluarsunnguanni kallerup innerata sinneqartoorutip aatornissaanut periarfissat misissorneqarput, takussusiiginnarporlu suliniuteqartoqartoq



sinaakkusiinissamik, qarasaasiatigut suliffissuit aningaasaliiumasullu pilerisaarniarlugit.

Taamaammat Demokraatit Naalakkersuisut allannguutissatut siunnersuutaat iluarisimaarpaat, imermik nukissiuuteqarnermi misilittakkat katersornissaannut aammalu paasissutissanik qarasaasiatigut katersuiffimmut tulluuttuunersut. Suleriutsip taassuma qulakkiissavaa, tunngaveqarluartumik aaliangernissaaq, periarfissat unammillernartullu qulaajarneqarlutik, politikkikkut suleriaqqinnissamut aalajangertoqannginnerani.

Pivusorsiorneruvoq isumatusaarnerullunilu taamatut suliniarneq. Qulakkiissavarput, ineriartorneq ingerlassasoq minngutsitsiviunngitsumik attanneqarsinnaasumillu, aammalu tassunga ilutigalugu nunaqavissunut iluanaarutaassalluni suliffeqarnikkut piginnaasanillu qaffassaanermi. Paasissutissanik qarasaasiatigut suliarinnittarfiit maani nunatsinni mingutsitsinnginnerusumut suliniarnitsinnut akuusinnaapput, tamannali pilersaarusiornermik, attaveqaasersuutillu kipisaqataanngitsut, tunaartalimmillu politikkikkut tapersersorneqarnissamik pisariaqartitsissaaq.

Demokraatit taamatut oqaaseqaateqarlutik siunnersuut aammalu Naalakkersuisut allannguutissatut siunnersuutaat aappassaaniinnginnerani Inuussutissarsiornermut- aamma Aatsitassanut ataatsimiititaliamut suliarineqartussatut innersuussutigaat.